

Voces de Queempostela

Folleto Mensual
de Información

Nº5, Setembro-1996

Editado polo
Colectivo Gai de
Compostela

Fin do período vacacional no CGC

Pasado agosto, os voluntários do CGC comezaron a se reunir para falar das actividades que han ocupar o Colectivo nos próximos meses. Tamén se fixo un balanço do acontecido durante o verán. En principio, non se prevé a creación ou supresión de comisións. Así, están xa a traballar as de Relacións Exteriores, Anti-agresións e a da Revista. Lembraide que podeades propor cambios e creacións ao respeito nas reunións do martes ou escribendo ao apartado. Se queredes tamén podeades traballar nas anteditas comisións acudindo ás súas reunións no local do CGC ou propondo ideas desde a vosa casa. É hora de traballar, nen@s !!!

PolíticaLingüística concede -lle unha subvención ao CGC

A Dirección Xeral de Política Lingüística concedeu-lle unha subvención ao CGC para sufragar os gastos de publicacións. Esta é a terceira subvención que recibe o Colectivo da Xunta e, inicialmente, empregará-se na publicación do próximo S'homos. Por outra banda, o CGC ten pensado inscibir-se no rexistro autonómico de asociacións prestadoras de servizos sociais para poder solicitar máis axudas ao goberno galego. O Colectivo pretende así ampliar a oferta de servizos e actividades, a máis de mellorar a formación do seu voluntariado.

Prepara-se xa un novo S'homos

A Comisión do Voceiro, visto o inesperado éxito do último número e a

posibilidade de empregar a pequena subvención concedida pola Xunta, xa se puxo a traballar na edición dun novo número do S'homos. Pretende-se que este novo número saia antes da fin do ano así que non deixedes de enviar as vosas suxestións e colaboracións (artigos, recensións, debuxos, fotos...) á Comisión. Lembraide ademais que a sección de anuncios e contactos é un espazo totalmente gratuito.

Nova xeira de tertulias

Deixadas de lado por mor da intensa actividade dos últimos meses, retomáronse as tradicionais tertulias do CGC. A máis de propiciar o debate entre os gais que se acheguen a elas, as tertulias pretenden dar a coñecer de xeito aberto o labor do Colectivo as persoas alleas a el. A vindeira tertulia pensa-se celebrar a finais do mes de outubro, o tema, a data e o lugar da cita aínda están por fixar. Os temas propostos para as novas tertulias xiran ao redor da actualidade gai: agresións, lexislación de parellas... pero se queredes propor un tema novo e preparardes o texto-introducción vinde até o local ou escribede ao apartado do Colectivo.

Finaliza a redacción do informe sobre agresións

A Comisión Anti-agresións está a rematar a redacción dun informe sobre a violencia física e verbal exercida sobre os homosexuais na Galiza. Tendo como referencia os testemuños recollidos nos propios parques e alamedas ou nos centos de cartas recibidas, a Comisión fai un repaso ás causas, consecuencias e tipoloxía das agresións homófobas no noso país. O informe, unha vez rematado, será enviado aos grupos parlamentares e à prensa propondo así un debate social ao respecto. Se coñecedes ou sofrestes casos de

agresións físicas e/ou verbais facede-llo saber à Comisión. O voso testemuño é fundamental na elaboración deste informe. Non esquezaades, ademais, que se ha respectar a privacidade do voso testemuño. Ah! E se queredes unha cópia do informe escribede ao apartado para recibela na casa ou pasade directamente polo local.

Proxecto de Lei de Familia: o CGC propón a presentación de emendas

O Partido Popular xa apresentou o seu Proxecto de Lei da Familia e da Infancia, que pretende definir o marco legal (obrigas e dereitos) das unidades familiares na sociedade galega. Despois dunha rolda de conversas con diferentes grupos parlamentares (PP e BNG, proximamente PSdG-PSOE) e de coñecer o texto do devandito proxecto, o CGC enviou-lles aos grupos da oposición unhas propostas de emenda. En primeiro lugar, o CGC pretende que as parellas de feito, sen fillos e con independencia da súa orientación sexual, sexan consideradas unidades familiares de pleno dereito ao igual que as parellas con fillos ou os matrimonios. Por outra banda, o CGC propón unha menor vaguidade no contido moral do proxecto, así como unha reconsideración da equiparación da adolescencia à infancia proposta no texto presentado polo PP. O CGC espera que os grupos da oposición tomen en conta estas suxestións e presenten emendas ao respecto. De todos xeitos, o Colectivo enviará senllas cartas aos grupos parlamentares para que informen das súas actuacións en relación ao Proxecto de Lei da Familia. Se queredes unha cópia do proxecto de lei pasade polo local ou escribede ao apartado de correos.

Informe sobre o labor de prestación social do CGC

O CGC ten pensado elaborar un informe no que se dea conta das actividades de axuda e apoio que presta aos homosexuais composteláns e galegos. Fará-se un repaso dos campos de traballo habituais, das actividades

realizadas (festas, tertulias, campañas...) e de proxectos para o futuro. Desde logo, no informe tamén constarán as importantes carencias de medios materiais e humanos que sofre o CGC. O informe irá tamén destinado aos grupos parlamentares xa que eles así o solicitaron. Tamén se lle enviará à Consellería de Familia para insistir na necesidade de subvencións para mellorar a atención prestada. Se tedes ideas ou suxestións para a redacción do informe pasade polo local ou escribede ao apartado.

Manifestación unitaria pola Lei de Parellas

Como o ano pasado, convocou-se unha manifestación unitaria de todos os colectivos de gais e lesbianas do Estado Español para pedir a aprobación dunha Lei de Parellas de Feito. Inicialmente, a convocatoria é para o día 26 de Outubro en Madrid. Nén o CGC nen a COFLHEE teñen decidido o seu apoio ou asistencia à devandita manifestación. Na última reunión da COFLHEE mesmo se propuña restrasar a convocatoria até novembro, como o ano pasado. Se estades interesad@s en ir à manifestación pasade polo local ou escribede-nos: habemos recibir máis información ao respecto en poucos días.

Festa antes do Natal

O Colectivo ten pensado organizar alomenos unha festa antes do Natal para recadar cartos e animar ao activismo e ao asociacionismo. Aínda non están concertadas as actuacións, así que anima-te e comeza a ensaiar. Se sabes cantar, bailar ou "transformar-te", o CGC dá-che a oportunidade de que lle-lo amoses aos demais. Só tes que facer-llo saber à comisión organizadora e subir ao cenário.

Xa sabes....

escribe-nos ao Apdo. 191

15780 Compostela

ou...

visita-nos na Rua Entremuros, nº16, Baixo, de luns a venres a partir das 20:30